

**26 OKTOBER 2020**

Pertahankan Hutan Simpan Kuala Langat Utara (PHSKLU),  
B-G-15, Pusat Perniagaan Seksyen 8,  
Jalan Sungai Jernih 8/1,  
46050 Petaling Jaya,  
Selangor.

**KEPADA:**

**ADUN dan Ahli Parlimen Selangor seperti dalam SENARAI EDARAN**

Yang Berhormat (YB),

**Memohon Sokongan Bagi Membantah Pemansuhan Hutan Simpan Kuala Langat Utara (HSKLU) Yang Menerima 45,416 Bantahan Secara Bertulis dan Dalam Talian (Online)**

Merujuk kepada perkara di atas, satu gabungan organisasi rakyat telah ditubuhkan untuk membantah cadangan bagi pemansuhan HSKLU. Gabungan ini telah ditubuhkan selepas kami mendapati Sesi Pendengaran Awam (Town Hall) Sesi II bagi cadangan Pemansuhan kawasan HSKLU, Mukim Tanjung Dua Belas, Daerah Kuala Langat yang dijalankan pada 28 dan 29 September 2020 di Amverton Resort, Pulau Carey; adalah tidak mengikut norma-norma serta prosedur yang sepatutnya.

2. Antara kesalahan tata tertib pelaksanaan Sesi Pendengaran Awam (Town Hall) Sesi II yang kami saksikan adalah:
  - a. Notis pemakluman mengenai Sesi Pendengaran Awam (Town Hall) tidak dimaklumkan secara terbuka untuk perhatian dan penyertaan semua pihak yang terlibat dalam proses bantahan bertulis;
  - b. Jemputan bagi Sesi Pendengaran Awam yang diedarkan kurang dari tempoh 30 hari dan tidak menjemput semua pihak yang terlibat dalam bantahan. Tindakan ini secara jelasnya membuktikan objektif sesi pendengaran tidak tercapai;
  - c. s. 8 (5) Kaedah-Kaedah Penyiasatan Awam (Selangor) 2014, menyatakan bahawa penyiasatan awam harus diadakan dalam masa 30 hari selepas tamatnya tempoh bantahan secara bertulis pada 5 Mac 2020. Namun, Jabatan Perhutanan Negeri Selangor tidak memberi sebarang keterangan mengenai penganjuran Sesi Pendengaran Awam bagi bantahan tersebut. Maklumat penganjuran Sesi Pendengaran Awam Sesi II hanya diketahui melalui siaran Facebook YB Hee Loy Sian pada 28 September 2020 pada 12.34pm (selepas tamat sesi pertama). Walaubagaimanapun, sebilangan besar kumpulan sasaran telah menghadiri sesi tersebut pada 29 September melalui penerimaan jemputan beberapa hari atau jam melalui aplikasi WhatsApp;
  - d. Tiada wakil-wakil pihak berkepentingan seperti berikut dalam Panel Jawatankuasa Penyiasatan Awam;
    - i. PERHILITAN (Jabatan Perlindungan Hidupan Liar dan Taman Negara)
    - ii. FRIM (Forest Research Institute of Malaysia)
    - iii. Exco Pembangunan Generasi Muda & Sukan
    - iv. ADUN Sijangkang
    - v. Ahli Parlimen Kuala Langat
    - vi. Pihak NGO
    - vii. Wakil Ketua Penduduk/ Tok Batin Orang Asli

- e. Tempat yang telah dipilih penganjuran bagi Sesi Pendengaran Awam terletak jauh dari HSKLU dan di luar Mukim Tanjung Dua Belas; dan
  - f. Kegagalan panel Jawatankuasa Penyiasatan Awam menjemput pihak-pihak yang melakukan bantahan terhadap pemansuhan HSKLU walaupun Jabatan Perhutanan Negeri Selangor (JPNS) mengakui telah menerima 45,416 bantahan. Tiada pihak/individu hadir di hari pertama Sesi Pendengaran Awam Sesi II iaitu pada 28 September 2020.
3. Kami berpendapat HSKLU tidak boleh dimansuhkan berdasarkan fakta-fakta nyata berikut:
- a. Penyahwartaan HSKLU akan mengabaikan hak masyarakat Orang Asli yang telah tinggal lebih dari 134 tahun (sekurang-kurangnya sejak tahun 1886). Kerajaan Negeri perlu adil dan saksama bagi melindungi kepentingan komuniti Orang Asli di kawasan berkenaan;
  - b. HSKLU merupakan satu daripada dua jenis hutan paya gambut yang masih wujud di bahagian selatan negeri Selangor. Ia memainkan peranan penting dalam sistem hidrologi berkaitan pengawalan banjir, menjadi sumber takungan air dan membantu dalam isu pencemaran udara, lebih-lebih lagi ia di dikelilingi kawasan industri berat seperti Shah Alam, Cyber Jaya dan lain-lain;
  - c. Pembukaan kawasan hutan bagi tujuan pembangunan bercampur akan menjejaskan rangkaian ekologi, mengakibatkan kehilangan habitat hidupan liar dan kepupusan akuatik.
    - Habitat kepada spesies terancam seperti Beruang Matahari (*Helarctos malayanus*), Tupai Terbang Terkecil Selangor (*Petaurillus kinlochii*) dan Ikan Laga Merah Langat (*Betta livida*).
    - Selain itu, HSKLU adalah habitat kepada beberapa spesies Dipterokarp yang mempunyai status "Terancam Kritikal" dan "Terancam" (terdapat pada Senarai Merah Tumbuhan Terancam di Malaysia) seperti Meranti Bunga (*Shorea teysmanniana*), Meranti Bakau (*Shorea uliginosa*) dan Mersawa Paya (*Anisoptera marginata*).
  - d. Meningkatkan risiko kebakaran dan penurunan tanah gambut di HSKLU dan kawasan sekitarnya;
  - e. Meningkatkan risiko banjir atau kekurangan air yang akan memusnahkan kawasan pertanian dan tanaman kelapa sawit yang diusahakan oleh masyarakat Orang Asli;
  - f. Gangguan ekologi kepada lembangan Sungai Langat dan Sungai Klang;
  - g. Pembangunan di kawasan HSKLU (termasuk penebangan pokok, pengorekan tanah gambut dan pembinaan saluran) membawa kepada pelepasan 5.5 juta tan karbon dioksida (CO<sub>2</sub>) yang menyumbang kepada pemanasan tempatan dan global serta masalah perubahan iklim. Pemansuhan HSKLU dan cadangan pembangunan campur tidak selaras dengan Komitmen Malaysia bagi Perjanjian Paris pada Persidangan Iklim Paris 2015 (COP21) yang mengurangkan 45% intensiti pelepasan gas rumah hijau daripada Keluaran Dalam Negara Kasar (KDNK);
  - h. Tiada lagi kawasan penting untuk tujuan penyelidikan, pendidikan, rekreasi, eko-pelancongan sebagaimana satu hub kepentingan sosio-ekonomi setempat.
  - i. Tidak selaras dengan Rancangan Fizikal Negara Ke-3 yang menyatakan kawasan ini sebagai Kawasan Sensitif Alam Sekitar (KSAS) Tahap 1 yang melarang sebarang bentuk pembangunan dijalankan;
  - j. Tidak selaras dengan perancangan Kerajaan Negeri Selangor dalam Rancangan Struktur Negeri 2035 untuk mengekalkan 32% kawasan hutan di Selangor;
  - k. Tidak selaras dengan Pelan Rancangan Tempatan Kuala Langat 2030 di mana HSKLU telah dikategorikan sebagai kawasan 'tiada pembangunan';
  - l. Konflik kepentingan di mana Menteri Besar (MB) selaku Pengerusi Lembaga Pengarah, Menteri Besar Incorporated (MBI) bertindak sebagai pihak yang memohon tanah dan meluluskan permohonan tersebut (Pengerusi Majlis Mesyuarat Kerajaan Negeri Selangor dan PTG Selangor). Secara jelasnya, ia menunjukkan konflik antara tanggungjawab pentadbir

- negeri dan kepentingan MBI berkemungkinan mengganggu integriti ketika menjalankan tugas dan tanggungjawab atau ketika membuat pertimbangan bagi cadangan pemansuhan HSKLU;
- m. Perintah Kualiti Alam Sekeliling (Aktiviti Yang Ditetapkan) (Penilaian Kesan Kepada Alam Sekeliling) 2015 menyatakan secara jelas bahawa jika ada perubahan kawasan hutan paya gambut seluas 50 hektar atau lebih untuk kegunaan perindustrian, perumahan atau pertanian, satu laporan penilaian kesan kepada alam sekeliling (EIA) diperlukan. Notis penyiasatan awam telah pun menyatakan bahawa tujuan penyahwartaan HSKLU adalah untuk pembangunan bercampur. Ini bermakna, berkemungkinan besar kawasan HSKLU yang merupakan hutan paya gambut, akan diubah untuk kegunaan perindustrian atau perumahan. Berdasarkan tujuan permohonan tersebut, satu laporan EIA menyeluruh perlu disediakan dan ia harus dibentangkan kepada pihak berkepentingan dan diluluskan sebelum proses penyahwartaan HSKLU dijalankan dan;
  - n. Tiada zon penampan hijau - satu kesalahan dan pelanggaran syarat-syarat pembangunan yang lestari.
  - o. Tanpa mengira latar belakang bangsa dan agama, kita semua mempunyai nilai etika dan kerohanian yang sama iaitu melakukan perkara yang betul dan menolak tindakan yang salah. Memusnahkan alam sekitar ketika kita berada di ambang perubahan iklim jelas sekali merupakan satu tindakan yang salah. Ia mengkhianati tanggungjawab kita sebagai rakyat Malaysia yang mendukung prinsip-prinsip Rukun Negara. Kita seharusnya mengambil pendekatan yang bijaksana di mana kemakmuran negeri Selangor dapat dinikmati bersama secara adil, saksama dan lestari.

4. Walaupun banyak bantahan telah disuarakan terhadap pemansuhan HSKLU, namun tindakan Kerajaan Selangor menggambarkan seolah-olah pemansuhan ini akan diteruskan tanpa pertimbangan sewajarnya. Namun, sehingga kini masih belum ada satu pelan pembangunan terperinci berkenaan pembangunan bercampur yang dimaksudkan. Sehubungan itu, apakah yang dimaksudkan sebagai pembangunan bercampur oleh Kerajaan Negeri Selangor? Adakah pembangunan bercampur ini dapat memberi manfaat secara langsung dari sudut nilai ekologi yang sama setimpal dengan kewujudan HSKLU ketika ini bagi rakyat negeri Selangor khususnya penduduk daerah Kuala Langat?

5. Justeru, kami berpendapat adalah lebih baik jika isu ini dibawa kepada perhatian umum dan wakil-wakil rakyat yang telah dipilih oleh rakyat Selangor untuk menentukan sama ada langkah pemansuhan HSKLU adalah tepat atau sebaliknya. Di bahagian bawah surat ini disediakan ruangan untuk pihak YB menandatangani sama ada menyokong atau membantah pemansuhan HSKLU. Kami berharap pihak YB dapat memberikan persetujuan/bantahan YB dengan menandatangani surat sokongan / akuan tersebut.

6. Untuk perhatian YB, kami juga telah melancarkan kempen tandatangan di atas talian untuk kempen ini. Oleh kerana itu, setiap surat akaun yang ditandatangani (atau tidak ditandatangani) akan kami terbitkan melalui kempen tandatangan ini. Kami berharap dengan pendekatan sebegini, rakyat dapat membuat keputusan yang lebih telus terhadap pemilihan wakil rakyat bagi kawasan mereka di Selangor. Sekiranya pihak YB mempunyai sebarang persoalan atau penetapan tarikh perbincangan perkara ini, pihak YB boleh menghubungi kami di talian telefon, atau di alamat e-mel seperti di bawah.

- a. Suresh Kumar | 019-569-6964 | peoplesbhr@suaram.net
- b. Damien Thanam | 012-696-1129 | damienthanam.divean@gmail.com
- c. Ili Nadiyah Dzulfakar | 018-358-2752 | nadiyah@klimaactionmalaysia.org
- d. Professor Madya Dr Darren Ong Chung Lee | 012-465-3750 | dongcl@gmail.com

7. Sehubungan dengan itu, kami masih menaruh harapan tinggi kepada pihak YB agar tidak keberatan untuk memberi maklum balas positif serta sokongan penuh terhadap bantahan pemansuhan HSKLU yang diutarakan. Segala kerjasama dan tindakan pihak YB amatlah kami hargai dan diakhiri dengan ucapan terima kasih.

Sekian, terima kasih.

Yang benar,

**Wakil-Wakil Gabungan Membantah Pemansuhan HSKLU**

1. Pertubuhan Pelindung Khazanah Alam ( PEKA )
2. SUARAM (Suara Rakyat Malaysia)
3. Persatuan Kesedaran dan Keadilan Iklim Malaysia ( Klima Action Malaysia- KAMY )
4. Five Arts Centre
5. Persatuan Tindakan Alam Sekitar Kuala Langat
6. EMPOWER Malaysia
7. Greenpeace Malaysia
8. Parti Sosialis Malaysia
9. Persatuan Aktivis Sahabat Alam (KUASA)
10. Center for Orang Asli Concerns (COAC)
11. Global Environment Centre (GEC)
12. Pertubuhan Alam Sekitar Sejahtera (GRASS) Malaysia
13. Malaysian Nature Society (MNS) Selangor Branch
14. Sahabat Alam Malaysia (SAM)
15. Treat Every Environment Special Sdn Bhd (TrEES)

---

## AKU JANJI ADUN / AHLI PARLIMEN SELANGOR

Saya menyatakan persetujuan untuk ~~MENYOKONG~~ / **MEMBANTAH** Pemansuhan Hutan Simpan Kuala Langat Utara oleh Kerajaan Selangor.

Yang benar,

Tandatangan:



**JUNE LEOW HSIAD HUI**  
Ahli Parlimen Hulu Selangor  
No K/P: 650113-07-5610

Nama: JUNE LEOW HSIAD HUI

ADUN/ Ahli Parlimen: AHLI PARLIMEN HULU SELANGOR

Tarikh: 6/11/2020

Komen: *Menyokong pembantahan ini.*